

**TEZAUUR LITURGIC**  
**28 DECEMBRIE**

**ACATISTUL**  
**SF. IERARH-MUCENIC**  
**NICODIM**  
**KONONOV,**  
**EPISCOPUL**  
**BELGORODULUI**



**MOSCOVA, 2000**



## **Акафист**

# **священномученику Никодиму, епископу Белгородскому**

### **Кондак 1**

---

Избранный угодниче Христов, новоявленный  
свещильниче земли Белгородския, святителем  
слава и мучеником радование,  
священномучениче Никодиме, тя, яко  
достойнаго преемника святителя Иоасафа  
почитаем и помощи и предстательства у  
Престола Божия от тебе просяще, песненными  
похвалами тя ублажаем:

Радуйся, святителю Никодиме, земли  
Белгородския славо и украшение.

### **Икос 1**

---

Ангеле земный и Небесный гражданине,  
богомудре святителю Христов Никодиме, вемы,  
яко много может молитва твоя, Владыку  
умилостивляющая. Темже память твою светло  
празднующе, молим тя, избави нас от всякия  
скорби и нужды, и сохрани от всех козней

вражиих нас неврежденными, да в умилении сердца воспоим тебе сицевая:

Радуйся, измлада Господа возлюбивый;

Радуйся, ангельски на земли поживый.

Радуйся, в житии твоём святителю Иоасафу поревновавый;

Радуйся, в творениих своих его прославивый.

Радуйся, в подвизех неустанно пребываяй;

Радуйся, чистоту сердечную стяжавый.

Радуйся, христиан непостыдное упование;

Радуйся, монашествующих наставление.

Радуйся, святителю Никодиме, земли Белгородския славо и украшение.

## **Кондак 2**

Видеша тя, богомудраго иерарха, не точию словом паству научающа, обаче добродетельным житием по Бозе пример показующа и отеческою любовию вся покрывающа, людие возблагодариша Всемилоствиваго Бога, даровавшаго им таковаго добраго пастыря, с любовию пояху Ему: Аллилуия.

## Икос 2

Разум просвещенный имея, достойно Богу в архиерейском сане послуживый, любовь искреннюю паствы своея стяжал еси, едина от них живот свой за тя положиши, егда богоборцы заключиша тя в темницу, тая, добрая жена священника, прииде умолити за тя властителя, ничтоже успеши, токмо жизни лишися. Таковой любви паствы твоея умиляемся и тебе поим:

Радуйся, правило веры и образ благочестия;

Радуйся, архиерейского сана в Бозе величие.

Радуйся, апостолом дивный подражателю;

Радуйся, паствы неленостный учителю.

Радуйся, ангельских ликом сотаинниче;

Радуйся, мученических полков  
сопричастниче.

Радуйся, святителей богодухновенное  
украшение;

Радуйся, Церкви Христовой велие  
похваление.

Радуйся, святителю Никодиме, земли  
Белгородския славо и украшение.

### Кондак 3

---

Силою Духа Божия укрепляемый, в монашестве жестокое житие поживе, постом и молитвою ветхаго человека в себе умерщвляя, в двери милосердия Божия неустанно толкийся, чистоту сердца стяжал еси, боголюбиве святителю Никодиме. Темже молим тя, испроси у Господа покаяннаго жития нам грешным, дабы и мы, обрета чистоту сердечную, выну воспевали Богу хвалебную песнь: Аллилуия.

### Икос 3

---

Имамы тя молитвенника тепла и за Землю Русскую предстателя ко Господу усердна, святителю отче Никодиме, примером добраго жития твоего поучаемся, в вере утверждаемся и по силе коегождо подражати тебе мало мало пытаемся, учителю достославный. Темже благодарно тебе воспеваем:

Радуйся, тело свое воздержанием увядивый;

Радуйся, плоть свою духови покоривый.

Радуйся, постом Богу послуживый;

Радуйся, молитвою Отца Небеснаго  
ублаживый.

Радуйся, сердце свое от страстей очистивый;  
Радуйся, жилище Духу Святому тамо  
уготовавый.

Радуйся, паству свою отечески возлюбил еси;  
Радуйся, яко тии за тя душу полагали есте.

Радуйся, святителю Никодиме, земли  
Белгородския славо и украшение.

#### **Кондак 4**

---

Буря тяжкая гонений, обрушившаяся на Русь  
Православную, не поколебаше тишины сердца  
твоего, святителю Никодиме, пребыва убо тамо  
Христос, Егоже ты всем сердцем возлюбил еси, и  
храм велий, многими добродетельми  
украшенный, в глубине сердца твоего Господеви  
устроил еси, с любовию поя Ему: Аллилуия.

#### **Икос 4**

---

Слыша о богоугоднем житии твоём, народ с  
верою к тебе притекаеху, яко к пастырю  
нелестному, егда же богоборцы злобныя  
восхитиша тя от среды их, тогда в молитве  
слезней к Богу обращахуся, воспеваша тебе  
таковая:

Радуйся, архиерее, Богом хранимый;

Радуйся, святителю, народом любимый.

Радуйся, сыновне Богу сердце свое отдавший;

Радуйся, Христа в храм сердечный приявший.

Радуйся, Таин Божиих благоговейный  
строителю;

Радуйся, велений Божиих усердный  
исполнителю.

Радуйся, за Христа в темнице томивыйся;

Радуйся, живота своего за имя Христово с  
радостью лишивыйся.

Радуйся, святителю Никодиме, земли  
Белгородския славо и украшение.

### **Кондак 5**

---

Боготечною звездою сияеши на тверди  
Церкви Христовой, от Петрова града  
благочестием возсиявый и до Белгородстей  
земли свет учения Христова донесый, богомудре  
святителю Никодиме. Темже молим тя: даруй  
нам сердца люботрудныя во взыскание Господа  
нашего Иисуса Христа, Емуже вкупе с тобою  
радостно воспоим: Аллилуия.

---

## Икос 5

Видяще тя, любовию к Богу горяща и вся во славу Божию творяща, людие ублажиша житие твое, боголюбиве отче Никодиме, восклицаша в радости: таков нам подабаше архиерей. Темже память твою светло празднуем и с любовию тебе воспеваем:

Радуйся, звездо от Петрова града в любви возсиявшая;

Радуйся, свеще, благодатию Белгородскую землю осветившая.

Радуйся, верный делателю винограда Христова;

Радуйся, цевнице, сладкозвучно воспевающая имя Иисусово.

Радуйся, добрый сеятелю слова Божия;

Радуйся, ревнителю чистоты Православия.

Радуйся, смирение сердечное возлюбивый;

Радуйся, князя гордых тем крепце уязвивый.

Радуйся, святителю Никодиме, земли Белгородския славо и украшение.

## Кондак 6

---

Праведнику божественному и молитвеннику крепкому Иоанну Кронштадтскому подражая, велию любовь к Богу показал еси, егда в безбожное лютое гонение на Церковь Христову, не убоялся еси лукавых слуг нечестия и грозно обновленческую ересь обличил еси, верно поя Богу: Аллилуия.

## Икос 6

---

Возсия Свет Христов в чистой храмине души твоя и указа тебе истинный путь спасения. Темже ложными обновленческими баснями не соблазнился еси и паству свою от впадения в злохитрья их сети сохранил еси. Тако и ныне спаси нас, святителю Никодиме, от всякия ереси и нечестия, да с любовью поем ти:

Радуйся, пастырю всероссийскому Иоанну достойный подражателю;

Радуйся, нечестия мужественный обличителю.

Радуйся, в вере и благочестии нас утверждающий;

Радуйся, паче всего любити Бога нас научающий.

Радуйся, невидимых врагов сокрушителю;  
Радуйся, всяких козней их разорителю.

Радуйся, архиерее, греховных уз  
разрешителю;

Радуйся, кающихся грешников с Богом  
примирителю.

Радуйся, святителю Никодиме, земли  
Белгородския славо и украшение.

### **Кондак 7**

---

Хотяще святии угодницы Божии почтити, в  
писаниих твоих подвиги и труды оных  
прославивый и паки им в житии твоём  
подражавый, с ними и сам прославися. Темже к  
лику избранных Божиих сопричтенный, вкупе  
со всеми святыми поеши Богу: Аллилуия.

### **Икос 7**

---

Новую богоборческую власть сердцем своим  
не приявый, разрушаша бо тии церкви и вельми  
озобляша христианы, мучиша и убиваша за  
имя Христово. Ты, яко добрый пастырь на  
защиту паствы твоея востал еси, святителю  
Никодиме, и живот свой за Христа положил еси.

Мы же подвиг твой ублажаем и молим тя  
приятти от нас похвалу сицевую:

Радуйся, Церкви защитниче неустрашимый;

Радуйся, воине Христов непобедимый.

Радуйся, кровь свою за Церковь Христову  
радостно проливший;

Радуйся, ангели Небесныя возвеселивший.

Радуйся, любовью злобу людскую  
победивший;

Радуйся, человеконенавистника в сердце  
поразивший.

Радуйся, Христа Евангельски возлюбивший;

Радуйся, вся заповеди Его исполнивший.

Радуйся, святителю Никодиме, земли  
Белгородския славо и украшение.

### **Кондак 8**

Сирых питателю, вдов защитителю, убогих и  
немоцных попечителю, страннолюбивое  
исполнял еси служение, милостиве святителю  
Никодиме, никтоже от тебе тощ и неутешен  
отъиде и, яко на земли суще толико милостив  
был еси, колико же ныне, в Славе Небесней  
сияя, имаши дерзновение молити за ны,

сродницы твоя земная, испроси нам спасения и вечного с Богом пребывания, да и мы вкупе с тобою воспоем Ему с любовью: Аллилуия.

### **Икос 8**

---

Все упование на Бога возложивый и крест страданий на рамена подъявый, за Христом невозвратно пошел еси, святителю Никодиме, и егда безбожные слуги антихристовы убиваша тя, с любовью их благословил еси, рече Господу: Отче, отпусти им, не ведают, что творят. Темже подвиг твой ублажише, дарова ти Христос все Царство Свое, идеже вечно ликуя со святыми, моли Бога о нас, поющих тебе:

Радуйся, Слова Божия верный исполнитель;

Радуйся, о сирых и убогих неусыпный попечителю.

Радуйся, любовью Самому Христу подражавый;

Радуйся, убийцы своя незлобиво простивый.

Радуйся, за любовь свою Царство вечная любви стяжавый;

Радуйся, молиться Богу за ны дерзновение приявший.

Радуйся, сладчайший лик Христов выну зриши;

Радуйся, Царицу всех цариц со святыми присно прославляеши.

Радуйся, святителю Никодиме, земли Белгородския славо и украшение.

### **Кондак 9**

---

Всякое имея попечение о души своей, потщался еси тую добродетельми украсити, алчущий и жаждущий правды Божия был еси, святителю Никодиме. Ныне же нетленную пищу райскую присно вкушаеши и Незаходимаго Света Христова радостно приобщаеши, с любовью сладце поя Ему: Аллилуия.

### **Икос 9**

---

Витии суемудренному не удобно есть разумети, како человек во плоти возможе житие ангельское на земли проводить. Темже, отче священне Никодиме, о души своея велие попечение имея, не дал еси сна скраниама твоима и веждома твоима дремания, слезы умиления, яко росу благоуханную, Богу приносяще за всю страждущую Русь Православную и несмысленных чад ея, во гресех

погибающих. Тако и за ны возопий ко Господу, помози спастися и в разум истины приити, всем славящим тя:

Радуйся, человече, ангельский нрав имевый;

Радуйся, в добродетелех вельми преуспевый.

Радуйся, внимательное житие проводивый;

Радуйся, умиление драгоценное стяжавый.

Радуйся, вся сладкая тленная презрел еси;

Радуйся, на поле сердечнаго покаяния безценный бисер Христа приобрел еси.

Радуйся, в блаженстве райстем Троицу прославляеши;

Радуйся, с кротцыми в Царстве Божии Христа, блаженне, созерцаеши.

Радуйся, святителю Никодиме, земли Белгородския славо и украшение.

### **Кондак 10**

Спасение от Бога улучивший в Невечернем Свете, яко звезда небесная, светом Христовым сияеши, святителю блаженне Никодиме, и паки в обагреной кровью твоими ризе, яко в царской порфире, пред очима Божиима предстоиши и вкупе с исповедницы и

новомученицы российскими поешы Богу:  
Аллилуия.

## Икос 10

---

Стена и прибежище был еси христианом, на  
правый путь я наставляющий и от  
богоборческа злобы я защищающий, святителю  
отче Никодиме. Темже возри милостивно на  
град наш и все грады и веси Отечества нашего,  
и молитвами твоими огради нас от всех  
воюющих на ны и от всяких бед спаси любовью  
поющих ти сицевая:

Радуйся, светильниче пресветлый,  
Белгородскую землю освещающий;

Радуйся, сосуде благодати неоскудевающий.

Радуйся, хранилище чудное Духа Святаго;

Радуйся, храме боголепный Бога Живаго.

Радуйся, добрый делателю, на ниве Божии  
верно потрудивыйся;

Радуйся, зрелый класе, в житницы Небесныя  
положивыйся.

Радуйся, недугов телесных целителю;

Радуйся, пороков греховных врачевателю.

Радуйся, святителю Никодиме, земли  
Белгородския славо и украшение.

### **Кондак 11**

---

Пение хвалы Богу житие твое бе, отче  
святителю Никодиме, тако монашеское и  
святительское житие совокупи, обрете добрый  
плод благочестия и ревности к богоутождению.  
Тако и тело твое добродетельми украси и в  
жертву богоприятную Богу принесе, сердцем  
поя Ему: Аллилуия.

### **Икос 11**

---

Светом Христовым просветися и абие к  
подвигу уготовися, давидски рекл еси: готово  
сердце мое, Боже, готово сердце мое и паки аз  
на раны готов. Не токмо усты Христа исповедал  
еси, обаче и страдал по Нем еси,  
священномучениче Никодиме, Имже ныне  
прославленный, побуждаеш ны воспевати тебе  
сице:

Радуйся, в посте и молитве житие  
проводивый;

Радуйся, тем Богу приятное сотворивый.

Радуйся, Светом Христовым просвещенный;

Радуйся, Духом Святым осиянный.

Радуйся, фиале, молитв благоуханных  
исполненный;

Радуйся, ковчеже, Духом Святым  
позлащенный.

Радуйся, первосвященниче, благодать  
сугубую приемший;

Радуйся, ревность Моисеову имевший.

Радуйся, Финеесе, честь Церкви Христовой  
защищающий;

Радуйся, яко Илия, беззаконников  
безстрашно обличающий.

Радуйся, святителю Никодиме, земли  
Белгородския славо и украшение.

### **Кондак 12**

---

Благодать Божественную испроси нам,  
святителю Никодиме, архипастыри и пастыри  
церковныя облагодати Духом Святым и вси  
верныя, чтущия святую память твою и песненно  
тя ублажающия, сего Утешителя в сердца  
приятя сподоби, да просвещеннии и  
очищеннии, прославим Бога, дивнаго во святых  
Своих, радостно поюще: Аллилуия.

## Икос 12

Поим песнь хвалы и благодарение Богу, даровавшему нам тя, новаго светильника земли Белгородския и всея Руси, славим Пресвятую Богородицу, милостию Своею нас посещающую и иконою Песчанскою всех нас ограждающую, чтим всех святых, в Земли Российстей просиявших. Темже, в сонме святых пребывающе, моли о нас грешных и немощных чадах твоих, святителю Никодиме, с любовью поющих ти:

Радуйся, радостный жителю Горняго Иерусалима;

Радуйся, яко на главе твоей сияет царская диадима.

Радуйся, яко победитель, венец славы от Господа восприявый;

Радуйся, немощныя бесовския дерзости силою Божию сокрушивый.

Радуйся, святителей славо и мучеников радование;

Радуйся, князей бесовских плач и велие рыдание.

Радуйся, райский цвете благоуханный;

Радуйся, достойный наследниче Земли  
Обетованной.

Радуйся, ратниче Божий непобедимый;  
Радуйся, Церкви столпе несокрушимый.

Радуйся, благодати приснотекущий  
источниче;

Радуйся, за землю Русскую дерзновенный  
молитвениче.

Радуйся, святителю Никодиме, земли  
Белгородския славо и украшение.

### **Кондак 13**

---

О, священная главо, иерарше  
достоблаженный, богомудре святителю  
Никодиме, услыши убо малое моление наше и  
Богу благоутробному принеси, да помилует нас  
рабов Своих и не помянет грехов и беззаконий  
наших. Темже вси исполнившись благодарения  
за вся милости Его безмерныя, вкупе с тобою  
вечно будем воспевати благодееющему Богу:  
Аллилуия. (Трижды)